

**Pineqaatissinneqarsimasunut inissiisarfinni
inissinneqarsimasunut pissaanermik atuisinnaaneq pillugu
nalunaarut (pissaanermik atuisinnaanermut nalunaarut)**

Kalaallit Nunaanni pinerluttulerinermi inatsimmi § 222, imm. 5, tak. inatsimmut nalunaarut nr. 1045 7. september 2017-meersoq, naapertorlugu aalajangersarneqarpoq:

§ 1. Pinerluttulerinermi inatsimmi § 222 naapertorlugu pinerlussimasunut inissiisarfik pinerlussimasumut pissaanermik atuisinnaatitaavoq

- 1) nakuusernaveersaartitsiniarlutik imaluunniit akiuuttut uninngatinniarlugit,
- 2) imminut toqunniarneq pinaveersaartinniarlugu imaluunniit imminut ajoqusernaveersaartitsiniarluni
- 3) qimaanaveersaartitsiniarluni imaluunniit qimaaniartut unitsinniarlugit, imaluunniit
- 4) peqqussutaasut atortinniarlugit, tamanna erngertumik pisariaqarpat, pinerlussimasoq piunganngippat imaluunniit sulisut peqqussutaat naalanngippassuk.

§ 2. Pinerluttulerinermi inatsimmi § 222 naapertorlugu, pinerlussimasunik inissiisarfimmi pissaanermik atuineq aatsaat pisariaqartinneqarpat atorneqassaaq. Pissaanermik atuisoqassanngilaq narrunarsaaneq, iluaallortitsisinnaaneq, akulerunnerup ajoqusiisinnaanera, siunertamut sanilliullugu annertuallassappata.

Imm. 2. Pissaanermik atuineq sapinngisamik qajassuartumik pissuseqarneq malillugu ingerlanneqassaaq.

Imm. 3. Nalunaarut una taamatulli pinerlussimasut inissiisarfinni inissinneqarsimasunut imaluunniit Pinerluttunik Isumaginnittunit nakkutigineqartunut atorneqartassaaq.

§ 3. Pissaanermik atuineq taamaallaat pissaaq tigumminninnikkut, eqqornaveeqqummik anaatamik aamma seqqartaammik atuinikkut.

Imm. 2. Tigumminninneq, eqqornaveeqqut, anaataq aamma seqqartaat taamaallaat atorneqarsinnaapput Kalaallit Nunaanni Pinerluttunik Isumaginninnermi pisortap malittarisassai atorlugit.

Imm. 3. Pissaanermik atuisagaanni qularnaartariaqarpoq, pissutsit malillugit pissaanermik atuinissaq, akulerunnerup siunertaa, narrunarsaaneq imaluunniit iluaallortitsineq, pissaanermik atuinernerup akornusiisinnaanera, annertuallaamik akulerunnerussanngimmat.

Tigumminninneq

§ 4. Tigumminninneq taamaallaat pisinnaavoq, siunertamut naapertuuppat eqqunngitsumillu pineqarnikkut iluaallortitsilluni iliuuseqarnerup malitsigisinnaasaa annertuallaassanngippat.

Imm. 2. Pinerlussimasunik inissiisarfik pissaanermik atuinikkut tigumminissimaguni, taava nakorsiertitsisoqassaaq, inissinneqarsimasoq eqqarsaatigalugu napparsimalertoqasimaneranik ajoqusertoqarsimaneranilluunniit pasitsaassisoqarpat. Inissiisarfimmiittup nakorsiarmissani tamanna eqquutsinneqassaaq.

Eqqornaveeqqut

§ 5. Inissinneqarsimasup susinnaajunnaartinnissaa kisiat siunertaralugu eqqornaveeqqut taamaallaat atorneqarsinnaavoq.

Imm 2. Eqqornaveeqqut taamaallaat atorneqarsinnaavoq akulerunnermi eqqunngitsumik pineqarnikkut iluaalliertitsinnginnissaaq ajoqusiinngissarlu siunertaappata akulerunnerlu annertuallaassanngippat.

Imm. 3. Inissiisarfimmi pissaanermik atuinikkut eqqornaveeqqut atorneqarpat nakorsiertitsisoqassaaq, inissinneqarsimasoq eqqarsaatigalugu napparsimalertoqasimaneranik ajoqusertoqarsimaneranilluunniit pasitsaassisoqarpat. Nakorsiertitsisoqassaaq tamanna inissiisarfimmiittup kissaatigippagu.

Anaataq

§ 6. Anaataq taamaallaat tigummineqarsinnaavoq piviusumik immikkut ittumik navianartoqarpat anaatamik atuinissamik pisariaqalersitsisumik.

Imm. 2. Anaatamik tunniussineq aatsaat pisinnaavoq inissiisarfimmi pisortap imaluunniit taassuma piginnaatitaata akuersineratigut.

Imm. 3. Immikkut ittumik pisoqanngikkaluortoq inissiisarfiup pisortaata nalilerpagu anaatamik tigummiartoqassasoq, tamanna Kalaallit Nunaanni Pinerluttunik Isumaginnittut pisortaanut aalajagingassanngortinneqassaaq.

§ 7. Anaataq isumatusaartumik atorneqassaaq pisariaqanngitsumik annertunerusumik ajoqusertoqannginnissaa eqqarsaatigalugu.

Imm. 2. Anaataq taamaallaat tallinut, niunut, qitimut nullunullu atorneqartassaaq.

Imm. 3. Anaataq niaqqumut, qungasermut, pukutsumut, qutummut, sakiannut, naanut, tartunut, akulaanut imaluunniit qiteralinnut atorneqartassanngilaq.

Imm. 4. Anaataq tilluutitut atorneqassanngilaq.

Imm. 5. Anaataq sapinngisamik seeqqunut, ikusinnut imaluunniit naggussanut allanut atorneqassanngilaq.

Imm. 6. Anaataq taamaallaat atorneqarsinnaavoq akulerunnermi eqqunngitsumik pineqarnikkut iluaalliertitsinnginnissaaq ajoqusiinngissarlu siunertaappata akulerunnerlu annertuallaassanngippat.

Imm. 7. Inissiisarfimmi pissaanermik atuinikkut anaataq atorneqarpat nakorsiertitsisoqassaaq, inissinneqarsimasoq eqqarsaatigalugu napparsimalertoqasimaneranik ajoqusertoqarsimaneranilluunniit pasitsaassisoqarpat. Nakorsiertitsisoqassaaq tamanna inissiisarfimmiittup kissaatigippagu.

Seqqartaat

§ 8. Seqqartaat taamaallaat tunniunneqarsinnaavoq, piviusumik immikkut ittumik navianartoqarpat seqqartaammik atuinissamik pisariaqalersitsisumik.

Imm. 2. Taamaallaat inissiisarfup ittuata imaluunniit inummut pisinnaatsitsissummik tunineqarsimasumit akuersisoqarneratigut seqqartaat tunniunneqarsinnaavoq.

Imm. 3. Seqqartaat taamaallaat atorneqarsinnaavoq akulerunnermi eqqunngitsumik pineqarnikkut iluaallortitsinnginnissaq ajoqusiinngissarlu siunertaappata akulerunnerlu annertuallaassanngippat.

§ 9. Seqqartaat atorneqarniarpat, sapinngisamik tamanna inissinneqarsimasumut ilisimatitsissutigineqassaaq, inissiisarfimmi sulisut inerteqqutigisaat naalanneqanngippata. Sapinngisamik qularnaarneqassaaq, inissinneqarsimasup periarfissaqarnissaa sulisut inerteqqutigisaasa naalannissaanik.

§ 10. Seqqartaatip atorneqareerneratigut inissinneqarsimasoq atuiffiusoq neqeroorfigineqassaaq ajoquserneqarnerminut ikiorserneqarnissamut.

Imm. 2. Inissiisarfimmi pissaanermik atuinikkut seqqartaat atorneqarpat nakorsiertitsisoqassaaq, inissinneqarsimasoq eqqarsaatigalugu napparsimalertoqasimaneranik ajoqusertoqarsimaneranilluunniit pasitsaassisoqarpat. Nakorsiertitsisoqassaaq tamanna inissiisarfimmiittup kissaatigippagu.

Nalunaarutiginnineq il. il.

§ 11. Inissiisarfik inissinneqarsimasumut pissaanermik atuisimaguni, taava sukkanerpaamik nalunaarusiussaaq nalunaarusiorfissaq immikkut ittoq atorlugu.

Imm. 2. Inissinneqarsimasup qinnuteqarnermi kingorna nalunaarusiap assilineqarneranik tunineqassaaq, tak. taamaattoq imm. 3.

Imm. 3. Nalunaarusiamik takunnissinnaaneq killilerneqarsinnaavoq ingerlatsinermik inatsit malilugu, inissinneqarsimasup nalunaarusiamut soqutiginninnera sumik tunngaveqarnersoq naapertuunnersorlu nalilersorneqassapput imminut, allanut imaluunniit pisortat soqutigisaannut, assersuutigalugu inissiisarfup isumannaatsuunissaanut imaluunniit inuit ataasiakkaat illersorneqarnissaat eqqarsaatigalugu.

Imm. 4. Inissinneqarsimasoq siunnersorneqassaaq periarfissaqartoq inissiisarfimmi pisortap pissaanermik atuisimamera pillugu naammagittaalliornissamut periarfissaqarneranik, tak. nalunaarutip § 13-ia. Suliaq pillugu immikkut ittumik nalunaarusiorfimmittup allaatiginnittoqassaaq.

Imm. 5. Sapinngisamik tuaviortumik Kalaallit Nunaanni Pinerlussimasunik Isumaginnittoqarfup pisortaanut ilisimatitsissusiortoqassaaq.

Piginnaatitaaneq

§ 12. Pissaanermik atuinissaq pillugu inissiisarfiup pisortaa aalajangiisuussaaq imaluunniit taamaaliornissamut piginnaatitaasoq.

Imm. 2. Pisuni ataasiakkaani ajornartoornikkut, piginnaatitaasoq imm. 1-imi taaneqartoq utaqqineqarpat, taava sulisumit allamit aalajangiineq pissaaq. Pissaanermik atuisoqarsimaneranik imm. 1-imi inuk pisinnaatitaasoq tuavioernerpaamik ilisimatinneqassaaq.

Naammagittaalliorneq

§ 13. Inissiisarfimmi pisortap pissaanermik atuinissamik aalajangersimanera Kalaallit Nunaanni Pinerluttunut Isumaginnittoqarfiup pisortaanut naammagittaalliutigineqarsinnaavoq pinerluttulernermut inatsimmi § 222 naapertorlugu.

Imm. 2. Kalaallit Nunaanni Pinerluttunut isumaginnittoqarfiup pisortaanut naammagittaalliuut, pissaanermik atuisoqarsimaneraniit qaammatit marluk qaangiutsinnagit ingerlateqqinneqassaaq. Taamaattoq naammagittaalliuut piffissaritap qaangiunnerata kingorna suliarineqarsinnaavoq qaangiuttoorsimaneq illersorneqarsinnaappat.

Imm. 3. Kalaallit Nunaanni Pinerluttunut isumaginnittoqarfiup pisortaanut naammagittaalliuut kinguarateqqinneqarsinnaanngilaq.

Atuutilerfissaa

§ 14. Nalunaarut 7. juni 2019 atuutilissaaq.

Imm. 2. Inissinneqarsimasunut pissaanermik atuisarneq pillugu nalunaarut nr. 1161, 7. december 2009-imeersoq (pissaanermik atuisinnaanermut nalunaarut) atorunnaarpoq.

Kalaallit Nunaanni Pinerluuteqarsimasunik Isumaginnittoqarfik, ulloq 3. juni 2019

NAAJA HJELHOLT NATHANIELSEN